

ЦЭРГИЙН ТАНГАРАГ ӨРГӨХ ЁСЛОЛ

1. Монгол Улсын иргэн цэргийн жинхэнэ албанд орохдоо цэргийн тангараг өргөнө. /Цэргийн албаны тухай хуулийн 5 дугаар зүйлийн 5.1 дүгээр заалт/

2. Цэргийн албанд шинээр татагдагч, цэргийн сургуульд элсэгч /цэргийн хөгжмийн болон цэргийн дунд сургуулийн сурагч хамаарахгүй/анхан шатны бэлтгэл хийж, цэргийн алба хаагчийн үндсэн үүргийг мэдэж, Цэргийн тангараг, Байлдааны туг, цэргийн албаны онцлогийг судлан ойлгосны дараа цэргийн тангараг өргөнө.

3. Цэргийн тангараг өргөх өдөр, цагийг ЗХЖШ /ХХЕГ, ОБЕГ/-ын дарга, Дотоодын цэргийн командлагч, Төрлийн цэрэг /ХЗЦ, АЦ/-ийн командлагч болон Үндэсний Батлан хамгаалахын их сургууль /Хууль сахиулахын их сургууль/-ийн захирлын тушаалаар зарлана.

Тангараг өргөх ёслол эхлэх цагт бие бүрэлдэхүүнийг ёслолын хувцастай жагсааж, Байлдааны тугийг “Цэргийн жагсаалын дүрэм”-д заасны дагуу залж байрлуулна. Тангараг өргөх үед бие бүрэлдэхүүнийг салаадын цувааны шугамд, тангараг өргөх дайчдыг тусад нь зэвсэгтэй жагсаана.

Цэргийн тангарагийн хэвлэмэл хуудас, нэрийн жагсаалтыг урьдчилан бэлтгэсэн байна.

4. Цэргийн тангараг өргөх ёслолыг цэргийн ангийн захирагч /захирал/ удирдана.

Ангийн захирагч /захирал/ үг хэлсний дараа, салбарын захирагч нарт цэргийн тангараг өргүүлэх зөвшөөрөл олгоно.

Салбарын захирагч тангараг өргөгчийн нэрийг дуудахад тэр жагсаалаас гарч, тангараг өргүүлж буй даргад илтгэн, түүний командаар цэргийн тангаргийг тод, чанга уншин өргөж, нэрийн хүснэгтэд гарын үсэг зурж баталгаажуулна. Цэргийн тангараг өргүүлж буй дарга цэргийн албаа нэр, төртэй хаах тухай захиас үг хэлж, баяр хүргэхэд цэргийн тангараг өргөсөн цэргийн алба хаагч бууг ёсолгоонд авч **“Монгол Улсынхаа төлөө зүтгэе”** гэж тод, чанга дуугаар хариулна. Дараа нь Байлдааны тугийн өмнө очин малгайг авч, зүүн хөлийг урагш тавьж, баруун өвдөг дээр сөгдөн толгой бөхийлгөөд, босч, малгайгаа өмсөж, туганд ёслоод эргэж жагсаалдаа орно.

Тангараг өргөх ёслолын дараа салбарын захирагч цэргийн тангараг өргөгсдийн гарын үсэг бүхий нэрийн жагсаалтыг ангийн захирагч /захирал/-д гардуулна.

5. Ангийн захирагч /захирал/ тангараг өргөсөн бүрэлдэхүүнд баяр хүргэхэд бие бүрэлдэхүүн гурвантаа **“Урай”** цуурайтуулсны дараа хөгжимд **“Төрийн дуулал”** эгшиглэнэ. Ангийн захирагч оролцохоор ирсэн ахлах даргад илтгэнэ. Төгсгөлд нь бие бүрэлдэхүүн ёслолын жагсаалаар явж өнгөрнө.

6. Цаг агаарын тохиромжгүй үед цэргийн тангараг өргөх ёслолыг байранд явуулж болно.

8. Хүндэтгэх шалтгаанаар цэргийн тангараг өргөөгүй бүрэлдэхүүнийг ангийн захирагчийн шийдвэрээр цэргийн тангараг өргүүлнэ.

9. Цэргийн тангараг өргөсөн өдрийг цэргийн ангид баяр, ёслолын өдөр

болгон нээлттэй зохион байгуулна.

10. Цэргийн тангараг өргөсөн бүрэлдэхүүний нэрийн жагсаалтын хуудсыг ангийн штабт хадгалах ба тогтоосон хугацааны дараа архивт шилжүүлнэ.

11. Цэргийн тангараг өргөөгүй цэргийн бэлтгэл үүрэгтнийг дайчилгаагаар цэргийн ангид ирмэгц цэргийн тангараг өргүүлнэ.

12. Цэргийн тангаргийг түүхийн дурсгалт газар, эх орныхоо эрх чөлөө, тусгаар тогтнолын төлөө байлдаанд баатарлагаар амь үрэгдсэн дайчдын хөшөө, дурсгалын дэргэд өргүүлж болно.